

十一面神呪心經

唐三藏法師玄奘奉 詔譯



南無本師釋迦牟尼佛

說明

本繁體校正版《十一面神呪心經》電子書，是根據清制《乾隆大藏經》大乘五大部外重譯經部，第 0324 部，唐三藏法師玄奘奉詔譯《十一面神呪心經》影印本校正的，標點符號僅供參考。

本電子書是免費結緣品，特此說明。

仁慧草堂

二〇一九年十月



掃碼關注仁慧草堂微信公眾號



南無聖觀自在菩薩摩訶薩

南無聖觀自在菩薩摩訶薩

南無聖觀自在菩薩摩訶薩

●起誦儀

楊枝淨水讚

(一編)

楊枝淨水，徧灑三千，性空八德利人天，福壽廣增延，滅罪消愆，火焰化紅蓮。

南無清涼地菩薩摩訶薩 (合掌三稱)

淨身業真言

(三編)

唵. 修哆唎. 修哆唎. 修摩唎. 修摩唎. 薩婆訶.

淨口業真言

(三編)

唵. 修唎修唎. 摩訶修唎. 修修唎. 薩婆訶.

淨意業真言

(三編)

唵. 鞞日囉怛訶賀斛.

安土地真言

(三編)

南無三滿哆. 沒馱喃. 唵. 度嚕度嚕. 地尾. 娑婆訶.

普供養真言

(三編)

唵. 誝誝曩. 三婆嚩. 伐日囉斛.

法華偈

(一編)

六萬餘言七軸裝 無邊妙義廣含藏
白玉齒邊流舍利 紅蓮舌上放毫光
喉中甘露涓涓潤 口內醍醐滴滴涼
假饒造罪過山嶽 不須妙法兩三行

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

南無聖觀自在菩薩摩訶薩 (合掌三稱)

十一面神呪心經

唐三藏法師玄奘奉 詔譯

如是我聞：

一時，薄伽梵住室羅筏竹筍道場，與大苾芻衆千二百五十人俱，菩薩摩訶薩無量無數，慈氏菩薩而爲上首。復有無量苾芻、苾芻尼、鄔波索迦、鄔波斯迦及諸天、龍、藥叉、健達縛、阿素洛、揭路荼、緊捺洛、莫呼洛伽、鳩槃荼、畢舍遮、人、非人等大衆圍繞，供養恭敬，尊重讚歎，而爲說法。

爾時，觀自在菩薩摩訶薩與無量俱胝那庾多百千持呪神仙，前後圍繞，來詣佛所。到已頂禮世尊雙足，右繞三匝，退坐一面，白佛言：“世尊！我有神呪心，名十一面，具大威力，十一俱胝諸佛所說，我今說之。爲欲利益安樂一切有情，除一切病故，滅一切惡故，爲止一切不吉祥故，爲却一切惡夢想故，爲遮一切非時死故，欲令諸惡心者得調淨故，有憂苦者得安樂故，有怨對者得和解故，魔鬼障礙皆消滅故，心所願求皆稱遂故。

“世尊！我不見世間若天、若魔、若梵、若沙門、若婆羅門等，以此神呪防護其身，受持讀誦，書寫流布，而爲一切災橫、魔障、刀杖、毒藥、厭禱、呪術所能害者。我亦不見以此神呪隨所住處若遠若近結作界已，有能越之，來相嬈害。唯除決定惡業應熟。世尊！彼當證知是事必爾，唯應信受，不應分別，如此則令一切災橫，皆悉遠離，不得侵近。此神呪心，一切諸佛同所稱讚，同所隨喜；一切如來憶持守護。

“世尊！我憶過去過殞伽沙等劫前，有佛出世，名百蓮華眼無障礙頂熾盛功德光王如來，應正等覺，我於爾時作大仙人，從彼世尊受得此呪。得此呪時，見十方佛，應時證得無生法忍，當知此呪具大威力。是故，若有淨信善男子、善女人等，欲受持讀誦此神呪者，應當恭敬至心繫念，每晨朝時，如法清淨念誦此呪一百八遍。若能如是，現身獲得十種勝利。何等爲十？一者，身常無病；二者，恒爲十方諸佛攝受；三者，財寶衣食受用無盡；四者，能伏怨敵而無所畏；五者，令諸尊貴恭敬先言；六者，蠱毒鬼魅不能中傷；七者，一切刀杖所不能害；八者，水不能溺；九者，火不能燒；十者，終不橫死。復得四種功德

勝利：一者，臨命終時，得見諸佛；二者，終不墮諸惡趣；三者，不因嶮厄而死；四者，得生極樂世界。

“世尊！我憶過去過十殞伽沙等劫，復過於此，有佛出世，名美音香如來、應、正等覺。爾時，我身作大居士，於彼佛所受得此呪。得此呪時，便於生死超四萬劫；誦持此呪，復得諸佛大悲智藏一切菩薩解脫法門。由此威力能救一切牢獄、繫閉、杻械、枷鎖、臨當刑戮、水火風賊、蟲毒厭禱、人、非人等種種苦難；由此，我於一切有情能作歸依、救護，安慰洲渚室宅；以此呪力，攝取一切勃惡藥叉、邏刹娑等，先令發起慈心愍心，然後安立於阿耨多羅三藐三菩提。

“世尊！我此神呪有大威力，若誦一遍即能除滅四根本罪及五無間，令無有餘，況能如說而修行者？若有曾於百千俱胝那庾多佛所種諸善根，乃於爾時得聞此呪，況能受持如說行者？若能晝夜讀誦受持此神呪者，我當令彼所有願求，悉得如意。若有能於半月半月，或第十四日，或第十五日，受持齋戒，如法清淨，繫心於我，誦此神呪，便於生死超四萬劫。

“世尊！我由此呪名號尊貴難可得聞。若有

稱念百千俱胝那庾多諸佛名號，復有暫時於我名號至心稱念，彼二功德平等平等。諸有稱念我名號者，一切皆得不退轉地，離一切病，脫一切障、一切怖畏，及能滅除身、語、意惡，況能於我所說神呪，受持讀誦，如說修行。當知是人，於無上菩提，則為領受，如在掌中。”

爾時，世尊讚觀自在菩薩言：“善哉！善哉！善男子，汝乃能於一切有情，發起如是大慈悲意，而欲開示此大神呪。善男子，汝由此方便，能救脫一切有情所有病苦、障難、怖畏、身語意惡，乃至安立一切有情於阿耨多羅三藐三菩提。善男子，我亦隨喜，受汝神呪，汝當說之。”

時，觀自在菩薩摩訶薩即從座起，偏袒一肩，右膝著地，曲躬合掌，而白佛言：“誦此呪者，應作是說：

“敬禮三寶！敬禮聖智海遍照莊嚴王如來！敬禮一切如來、應、正等覺！敬禮聖觀自在菩薩摩訶薩大悲者！

“怛經他 闍_一達囉達囉_二地嚩地嚩_三杜嚩杜嚩_四壹_{去聲}𪔐_{下同}伐_五𪔐折隸折隸_六鉢囉折隸_七俱素謎_八俱蘇摩伐_九𪔐壹履弭履_十止履止徵_{十一}社_{知里切}羅_{時賀切}摩波捺耶_{夷何切}戌_{輸律切}陀薩埵_{十三}莫訶迦嚩尼_{上聲}迦_{十四}

莎去聲下
皆同訶十五

“世尊！此是根本神呪。若有念誦，獲如上說功德勝利。

“敬禮三寶！敬禮聖智海遍照莊嚴王如來！敬禮一切如來、應、正等覺！敬禮聖觀自在菩薩摩訶薩大悲者！

“怛經他 呵呵呵呵—壹隸弭隸—止隸婢隸—

棄上聲隸上聲下
皆同呬四隸四莎訶五

“世尊！此是呪水及衣呪。若欲入道場，先當洗浴，後以此呪呪水七遍，灑身結淨；復以此呪呪衣七遍，然後取著。

“敬禮三寶！敬禮聖智海遍照莊嚴王如來！敬禮一切如來、應、正等覺！敬禮聖觀自在菩薩摩訶薩大悲者！

“怛經他 拄吒古切嚕拄嚕—呵呵呵呵—莎訶—

“世尊！此是呪香燈呪。若入道場，欲燒香供養時，先以此呪呪香七遍，然後燒之；欲然燈時，先以此呪呪油七遍，後以然燈。

“敬禮三寶！敬禮聖智海遍照莊嚴王如來！敬禮一切如來、應、正等覺！敬禮聖觀自在菩薩摩訶薩大悲者！

“怛經他 死囉死囉—地囉地囉—死囉地囉—

莎訶^四

“世尊！此是呪華香鬘呪。若入道場，欲以華香鬘供養時，先以此呪呪華七遍，用散尊像；復以此呪呪香七遍，以塗尊像；復以此呪呪鬘七遍，以嚴尊像。

“敬禮三寶！敬禮聖智海遍照莊嚴王如來！敬禮一切如來、應、正等覺！敬禮聖觀自在菩薩摩訶薩大悲者！

“怛經他 娑睇娑睇—死地死地—素^{上聲}_{下同}杜素
杜^三莎訶^四

“世尊！此是呪獻佛供呪。若欲以飲食、華果等供養佛時，先誦此呪，呪之二十一遍，然後獻奉。

“敬禮三寶！敬禮聖智海遍照莊嚴王如來！敬禮一切如來、應、正等覺！敬禮聖觀自在菩薩摩訶薩大悲者！

“怛經他 末死達死—折囉折囉—虎嚕虎嚕^三
主嚕主嚕^四素^{上聲}_{下同}嚕素嚕^五母嚕母嚕^六莎訶^七

“世尊！此是呪薪呪。若欲以上根本神呪，隨事有所作時，先以此呪呪闍底華木一遍，擬用然火；復別取闍底華木，寸截以爲三十一段，用酪酥蜜漬之經宿，每取一段呪之一遍，即擲火中，

乃至皆盡，然後隨事，作所應作。

“敬禮三寶！敬禮聖智海遍照莊嚴王如來！敬禮一切如來、應、正等覺！敬禮聖觀自在菩薩摩訶薩大悲者！

“怛經他 壹履弭履—比履底_{丁里切}履_{下皆同}二止履呬履_三莎訶_四

“世尊！此是結界呪。欲結界時，先以此呪呪水七遍，散灑四方；或呪芥子，或呪淨灰，皆至七遍，散四方面，隨心遠近，即成界畔，而為防護。

“敬禮三寶！敬禮聖智海遍照莊嚴王如來！敬禮一切如來、應、正等覺！敬禮聖觀自在菩薩摩訶薩大悲者！

“怛經他 比胝比胝—底胝底胝二止胝止胝_三費_{房匪切}胝費胝_四揭車揭車_五薄伽梵_六阿唎耶婆_{肥何切}盧枳低濕伐囉_七颯縛婆縛_{去聲}南_八莎訶_九

“世尊！此是請我還自宮呪。若所作事竟，請我還自宮時，應以此呪呪水七遍，散灑四方，我便還去。

“世尊！如是神呪，雖不成立，而亦能作種種事業，至心念誦，無不獲願。若患瘡病，或一日一發，或二日一發，或三日一發，或四日一發；

若患鬼病，或部多鬼所作，或荼耆^{上聲}尼所作，或畢舍遮所作，或羯吒^{平聲}布怛那所作，或癩鬼所作，或癘鬼所作，或餘種種惡鬼所作，皆以此呪呪彼患者一百八遍，即得除愈。若障重者，用五色縷，誦呪作結，一遍一結，凡一百八結，以繫病人頸上，或繫臂上，罪障消滅，病即除愈。若患丁腫、癰腫、癩瘡、疱瘡、疽瘍癬等種種惡病，若被刀箭矛稍等傷，蛇蠍蜈蚣毒蜂等螫，皆以此呪呪之七遍，即得除愈。若障重者，呪黃土泥至一七遍，用塗病處，所苦得除。若患緩風、偏風、癱風、耳聾鼻塞癩風等病，皆應至心念誦此呪，呪彼患者一百八遍，病即除愈。若障重者，以油或酥煎樺皮及青木香，每呪七遍，即用塗身，或滴耳鼻，或令服之，所患便愈。若有所餘種種疾病，皆應至心以此呪呪之，或自念誦，即得除差。

“世尊！若欲成立此神呪者，應當先以堅好無隙白栴檀香，刻作觀自在菩薩像，長一磔手半；左手執紅蓮華，軍持；展右臂，以掛數珠，及作施無畏手。其像作十一面，當前三面，作慈悲相；左邊三面，作瞋怒相；右邊三面，作白牙上出相；當後一面，作暴惡大笑相；頂上一面，作佛面像。諸頭冠中，皆作佛身。其觀自在菩薩身上，具瓔

珞等種種莊嚴。造此像已，欲求願者，著新淨衣，受持齋戒，從白月一日至第八日，每日三時念誦此呪一百八遍，或無量遍。從此以後，於一靜處，敷清淨座，安置所造觀自在菩薩像，面向西方。隨力所辦，獻諸飲食。唯燒沉水及蘇合香，行者當食大麥乳食，如前念誦至第十三日。從此以後，所設供具，須倍勝前。行者唯應食三白食，謂乳酪飯。取菩提樹木像前然火，復取彼木寸截以爲一千八段，用靚嚙色迦香油漬之，每取一段誦呪一遍，擲置火中，乃至皆盡。爾時，大地岌然搖震，由此像身亦即運動，從最上面口中出聲，讚行者言：‘善哉！善哉！善男子，汝能如是勤苦求願，我當令汝所願滿足，令汝於此騰空而去，或復令汝所遊無礙，或作持呪仙人中王，或使如我自在無障。’復次，行者或於白月第十五日，以十一面觀自在菩薩像，置有佛馱都制多中，著新淨衣，受持齋戒，經一日一夜，不飲不食。取蘇末那華一千八枚，每取一華呪之一遍，擲置像上，乃至皆盡。爾時，其像當前面，口中出聲，猶如雷吼，由此便令大地震動。行者爾時應自安心，勿生恐怖，但念神呪，乞所期願，作如是言：‘敬禮聖觀自在菩薩摩訶薩大悲者！我於何時

能與一切有情作大依怙？能滿一切有情心之所願？’時，觀自在便與其願。當與願時，諸天龍等，無有能與作障礙者。復次，行者於月蝕時，取酥一兩，銀器盛之，置此像前，念誦此呪，乃至是月還生如故，便取食之，身中諸病無不除愈。復次，行者應等分取雄黃、牛黃，置此像前，念誦此呪一千八遍，以水和之，點置眉間，三事成就，如前所說。若和煖水洗浴其身，則一切障礙，一切惡夢，一切疫病，皆得除愈。復次，若他方怨賊欲來侵境，應取胭脂一顆，誦此呪呪之一百八遍，粧點此像，左邊瞋面正向彼方，令怨賊軍不得前進。復次，若國土中人畜疫起，於此像前，然任婆木火，復別取彼木，寸截以爲一千八段，每取一段塗芥子油，呪之一遍，擲置火中，乃至皆盡；復取緋縷，作七呪結，一呪一結，繫置最上佛面頂上，能令疫病一切消除。疾疫除已，解去呪索。復次，若有卒爲茶耆^{上聲呼}尼部多鬼等魅著成病，應取白縷作二十一呪結，一呪一結，繫著當前慈悲面頂上，經一宿已，解取以繫病人頸上，病即除愈。若業障重不除愈者，應取此索，更呪一百八遍，繫前所繫像頂上，經一宿已，解取以繫病人頸上，必得除愈。復次，若有長病困苦不

差，或惡神鬼來入宅中，應取薰陸香一百八顆，在此像前，顆呪一遍，擲置火中，乃至皆盡；復取白縷作二十一呪結，一呪一結，繫置當前慈悲面頂上，經一宿已，解取繫病者頸上，所患除愈，惡鬼退散。

“復次，若爲怨讎伺求其便，鬪爭厭禱欲作衰害，應以種種香華等物供養此像，以婆鑠迦木像前然火，取芸臺子一百八顆，各呪一遍，擲置火中；復取白縷，結作一百八結，一呪一結，繫著此像左邊瞋面頂上，經一宿已，解取此索，稱怨讎名，截一一結，各令異處，一稱一截，乃至都盡，令彼怨讎所作不遂，自然歸伏。復次，若人欲求諸善好事，取五色縷結作呪索，一百八結，一呪一結；復於像前呪之七遍，繫置當前慈悲面頂上，經一宿已，解取繫自身上，所求如意。復次若知身中有諸障難，所求善事多不随心，衰禍時時無因而至，應以香水浴此像身；復取此水呪之一百八遍，以浴毗那藥迦像身；復取呪之一百八遍，自灑其身，一切障難自然消滅，諸有所求無不如意。”

爾時，觀自在菩薩摩訶薩說此語已，一切大衆同時讚言：“善哉！善哉！大士！乃能爲欲利

益安樂諸有情故，說此神呪，我等隨喜，亦願受持。”

爾時，大衆歡喜踊躍，繞佛三匝，作禮而去。

十一面神呪心經

● 結誦儀

補闕真言

(三編)

南無喝囉怛那. 哆羅夜耶. 佉囉佉囉. 俱住俱住. 摩囉摩囉. 虎囉. 吽. 賀賀. 蘇怛拿. 吽. 潑抹拿. 娑婆訶.

補闕圓滿真言

(三編)

唵. 呼嚧呼嚧. 社曳穆契. 莎訶.

普迴向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉嚩吽.

觀音菩薩讚

(一編)

觀音大士，悉號圓通，十二大願誓弘深，苦
海渡迷津，救苦尋聲，無刹不現身。

觀音菩薩妙難酬 清淨莊嚴累劫修
三十二應徧塵刹 百千萬劫化閻浮
瓶中甘露常徧灑 手內楊枝不計秋
千處祈求千處應 苦海常作度人舟

南無普陀琉璃世界.大慈大悲.觀世音菩
薩 (一稱)

南無觀世音菩薩摩訶薩 (數百千稱)

讚觀音文

(跪念一編)

南無過去正法明如來現前觀世音菩薩，成妙
功德，具大慈悲，於一身心，現千手眼，照見法
界，護持眾生，令發廣大道心，教持圓滿神呪，
永離惡道，得生佛前。無間重愆、纏身惡疾莫能
救濟，悉使消除；三昧辯才、現生求願咸令果遂，
決定無疑。能使速獲三乘，早登佛地。威神之力，
歎莫能窮。故我一心歸命頂禮。

迴向偈

(跪念一遍)

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國

十方三世一切佛。一切菩薩摩訶薩。摩訶般
若波羅蜜。(念畢，起身三禮而退。)



此咒置經書中可滅誤跨之罪

南无护法韦驮尊天菩萨

